

**Uunga siunnersuut: Allakkerineq pillugu Inatsisartut peqqussutaat nr. xx, xx. xxxx
2011-imeersoq****Akissuteqaat**

(Ineqarnermut, Attaveqarnermut Angallannernullu Naalakkersuisoq)

Aappassaaneerinnineq

Naalakkersuisut aallarniutigalugu Ineqarnermut Attaveqaatigiinnernullu Ataatsimiititaliaq isumaliutissiissutaanut inassutigineqartunullu tunngatillugu sukumiisumik sulisimaneranut qutsaviginiarpaat. Ataatsimiititaliap isumaqatigiittup inatsisissatut siunnersuutip akuerineqarnissaa inassutigigaa Naalakkersuisut naammagisimaarlugu paasivaat.

Akuersinissamili taarsiissuteqartarneq pillugu malittarisassiornissamut tunngavissamik erseqqissaaviusumik Naalakkersuisut allannguutissatut siunnersuuteqarnissaat kiisalu atuisartut naammagittaalliorsinnaanerit pillugu aalajangersakkanik annetunerusunik ilanngussinissaat piumasarineqarpoq. Inatsisartut inatsisaannik suliarinninnermi innuttaasut inatsisitigut illersorneqarnerisa inatsisillu eqaannerulersinneqarnissaanut allanngortinneqariaannaanissaanullu periarfissat akornanni oqimaaqatigiisitsiniartoqarsimavoq. Taamaattumik Inatsisartut inatsisaata piginnaatitsiviunerusunik aalajangersakkanik imaqartillugu ilusiliineq toqqarneqarsimavoq, aalajangersakkat suliarinninnermut tunnganerusut nalunaarummut innersuussutigineqarlutik. Taarsiissuteqartarneq kiisalu naammagittaalliortarneq pillugu malittarisassat ajorseriartinneqannginnissaat Naalakkersuisut pingaartissimavaat tamannalu siunnersuummut ilanngunniarneqarsimavoq.

Taarsiissuteqartarneq pillugu aalajangersakkamut tunngatillugu erseqqinnerulersitsinissamik paasiuminartitsinissamillu siunertaq siunnersuummi naammassineqanngitsoq ataatsimiititaliaq isumaqartoq Naalakkersuisut paasivaat. Tamatuma saniatigut naalakkersuisut paasivaat ataatsimiititaliaq isumaqartoq naammagittaalliorsinnaaneq pillugu aalajangersakkat tamarmik Inatsisartut inatsisaannut ataatsimoortinneqarnerat paasiuminarsaataallunilu naapertuunnerussasoq, innuttaasut pisinnaatitaaffimminnik paasiniaallutik inatsimmik nalunaarummillu misissuisariaqarunnaarniassammata.

Ilisimatitsissutigineqarsinnaavoq Naalakkersuisut isumaqarmata sammisaq ataaseq pillugu aalajangersakkat tamarmik pingaarnertut inatsimmut ataatsimoortinneqarnissaat naapertuuttuaannanngitsoq. Tunngavissat pillugit aalajangersakkat inatsimiitinneqarnissaanut tunngavissallu taakku imaannik suliarinninnertaata nalunaarummi aalajangersarneqarnissaanut pissutissaqarluarsinnaavoq. Tamanna allakkat pillugit inatsisissatut siunnersuummik saqqummiussinnermut tunuliaqutaavoq – eqaannerulersitsinissaq allannguinnissamullu piareersimaneq.

Innuttaasulli naammagittaalliorsinnaatitaanerisa allanngortinneqarnissaat ajorseriartinneqarnissaallunniit Naalakkersuisut siunertarinngilaat taamaattumillu ataatsimiititaliap oqaaseqaatai tusaatissatut tiguneqarput, aammalu siunnersuummut

allannguutissatut siunnersuut taarsiissuteqartarnermut tunngavissap erseqqinnerulernissaa, kiisalu naammaagittaalliorsinnaaneq pillugu malittarisassat tamarmik Inatsisartut inatsisaannut ataatsimoortinneqarnissaat pillugu ataatsimiititaliap isumaanik naammassinnittoq maannakkut saqqummiunneqarpoq.

Taamaalillutik Naalakkersuisut kaammattuutigisinnaavaat siunnersuut pingajussaaneerpeqassasoq.